

Pembalakan lestari untuk ekonomi, alam sekitar

POKOK-POKOK hutan yang belum tercemar terdapat di atas bukit di Tunjuk Laut Resort, Mersing, Johor.

UM (MEGA BAINS) - 20 8/11

PEMBALAKAN sering kali dikaitkan dengan pelbagai kemusnahan yang bukan sahaja memberi kesan buruk ke atas kehidupan di dalam hutan tetapi juga masyarakat setempat.

Pencemaran sungai serta kemusnahan pokok serta habitat hidupan liar seperti gajah, harimau, pelanduk malah ular antara isu yang sering dibangkitkan.

Tanpa menafikan keadaan ini, pada masa sama orang ramai mungkin tidak mengetahui bahawa aktiviti mengeksport komoditi berasaskan kayu adalah yang ketiga terbesar selepas minyak sawit dan getah.

Bagi negara membangun seperti Malaysia, hasil eksport industri kayu negara memberi sumbangan besar kepada pembangunan ekonomi.

Sebahagian besar eksport berasaskan kayu negara adalah dalam bentuk produk yang siap diproses terutama sebagai perabot, diikuti produk separa siap seperti papan lapis, kayu gergaji dan cebisan kayu.

Melihat kepada jumlah ini, mungkin ramai yang tertanyanya dari manakah datangnya sumber bahan mentah kayu balak untuk diproses sebelum dihantar ke luar negara?

Untuk pengetahuan, sebahagian daripadanya dituai dari dalam negara



PESERTA program Program Pembiasaan Majlis Perakayuan Malaysia (MTC) Untuk Wartawan Tempatan dibawa melawat kawasan tapak pembalakan di Hutan Simpan Bukit Kinta dekat Batu Gajah, Perak. - BERNAMA



ABDUL RAHIM NIK

dan sebahagian lagi diimport dari negara seperti Amerika Syarikat, China, Australia, Vietnam, Thailand dan Brazil.

Langkah ini bagi mengelakkan penuaian balak secara berlebihan di dalam negara memandangkan Malaysia berikrar untuk memastikan sekurang-kurangnya 50 peratus tanah negara diliputi hutan. Hari ini, 55.3 peratus kawasan di seluruh negara masih diliputi hutan.

Tindakan mengimport kayu turut memberi pilihan kepada pengilang di Malaysia mendapatkan kayu berkualiti

dari luar negara untuk pengeluaran produk yang sesuai untuk kegunaan khusus di sesetengah negara pembeli.

Dengan cara ini industri yang menjadi sumber rezeki kira-kira 240,000 pekerja (huluan dan hiliran) di seluruh negara ini dapat terus bertahan dan mempunyai daya saing di pasaran dalam dan luar negara.

Menyantuni rombongan di Ibu Pejabat Majlis Kayu Kayan Malaysia (MTC) di Kuala Lumpur sempena Program Pembiasaan MTC Untuk Wartawan Tempatan baru-baru ini, Ketua Pegawai Eksekutif MTC, **Datuk Dr. Abdul Rahim Nik** berkata,

perkataan 'penebangan' hutan mungkin sudah tidak lagi sesuai digunakan dalam konteks amalan pembalakan lestari yang diamalkan pada masa ini.

Menurut beliau, istilah yang lebih tepat adalah 'penuaian' kerana konsep pembalakan lestari hanya melibatkan pokok yang sudah matang dan membiarkan pokok yang belum memenuhi kriteria untuk terus membesar.

Beliau menambah, istilah tersebut juga sudah digunakan dengan secara meluas dalam industri pembalakan di negara maju sambil menyifatkan standard yang diguna pakai di Malaysia adalah bertahap dunia

dengan pematuan piawaian-piawaian serta amalan kerja yang ditetapkan organisasi antarabangsa.

"Sudah sampai masa untuk orang awam memahami wujudnya sistem Pengurusan Hutan Lestari (SFM) yang sudah wujud di negara ini sejak lebih 100 tahun lalu.

"Pada pandangan saya ramai yang tidak memahami sepenuhnya tentang industri ini. Untuk itu adalah penting untuk pihak kami menunjukkan pelbagai usaha yang dijalankan untuk memastikan kelestarian alam sekitar. Ini untuk melindungi alam sekitar dan masyarakat," kata beliau.

Program dua hari anjuran MTC itu membawa rombongan wartawan media cetak, elektronik dan digital menjelajah Kuala Lumpur, Selangor dan Perak untuk melihat sendiri tapak pembalakan lestari serta amalan piawai industri perakayuan yang diguna pakai pengilang tempatan.

INFO

Nilai eksport komoditi kayu melonjak dari RM20.79 bilion pada 2014 kepada RM22.15 bilion pada 2015.

Nilai eksport mengalami sedikit penurunan pada tahun lalu yang mencatatkan RM22.11 bilion.

Jumlah ini tidak termasuk nilai pasaran dalam negara yang pada tahun 2016 yang meraih RM18 bilion, menjadikan nilai industri ini pada tahun 2016 sahaja RM40.11 bilion.

Nilai eksport yang dicatat daripada Januari hingga Jun lalu pula adalah RM11.5 bilion.

Pasaran eksport adalah Jepun, Amerika Syarikat, India, Australia, Singapura, Korea Selatan, United Kingdom, China, Taiwan dan Thailand.